

四庫全書

集部

欽定四庫全書

石倉歷代詩選卷四百四十二

明 曹學佺 編

明詩次集七十六

張濬

字文哲閩縣人天順三年鄉舉仕至饒平尹別號畏齋因名其集

次鄭司訓詠盆池白蓮韻

石盆數枝蓮皎皎冰玉宇對之若鉅儒臨風肅簪屨於
焉湛性靈謝絕浮塵慮幽香落酒杯雅韻生詩句月照

盆水寒誰識花中趣

送茅齋弟同賦風雨連牀

風雨蒲城縣連牀兩弟兄呼兒剪孤燭坐聽難為情夜
長風雨何淒切蕉葉梧枝響欲折百千里外憶鄉園三
十年來話離別迎雲樓中童卯時重簷花落夜眠遲共
被笑言踏裏裂起來展冊爭吾伊秋風聯袂遊京闕回
望鐘山入寧國敲蓬悶對曉翻江催詩靜看寒成雪嶺
之南浙之東蒼梧望湘水浮萍無定蹤漁火平洲沙漠

漠征鞍山店樹濛濛
瞻雲時得還家約
棠棣亭臺春灼灼
遲遲下虛簾沈沈
動清酌歡娛不抵
別愁多強半年
光客裏過消得幾
番風雨夜少年豪
氣渾消磨今夕復
何夕饒山對岑寂
樽酒飲不成相看
心戚戚子近四十
六我踰四十七讀
書尚古人于世曾
何益而今華髮已
墮顛為忠為孝事
茫然文希班馬蟲
測海道幾周公階
升天功名不足昭
先哲福慶無由垂
後澤北堂日影在
桑榆為謁精誠奉
顏色言之累百莫
盡懷四簷風雨還

復來竹爐火活新茶熟譙門鼓絕殘更催強將巾櫛肅
儀觀霽日看看上霄漢官貧何以贈君歸惟有詩篇滿
行擔鄉園到日喜忡忡我自寒山守歲窮若是明朝更
風雨能令我作白頭翁

秋夜詞

松亭涓滴露華清月中兩兩鸞簫鳴聞來縹緲亦堪愛
不是儂家絃上聲西風吟冷羅衣裳銀缸明滅歸洞房
依稀夢逐仙舟去聽得歌聲繞拒霜

早發雲川

湖白煙光遠山陰月色蒼雞聲隱深樹雁夢落清霜羈
思縈孤棹行期念故鄉依稀見亭館天際晃朝陽

玩新竹

澹月虛窗曉焚香理素琴清泠仙珮下天矯瑞鸞吟雨
淨枝枝玉風迴片片金相思人不見苔上拾瑤簪

到四會

今識綏州地孤城瞰海腰人家盡編竹村巷半栽蕉墟

市三朝貨畬田八峒
猺喜聞周茂叔遺祀在山椒

小樓對月寄廷瑞

樓居梧竹上風細月娟娟
好景憐今夕佳遊憶往年
流光銷綠髮舊業負青氈
忽聽驚枝鵲幽懷倍黯然

青鸞孤影

失却朝陽伴幽棲祇自憐
露寒凋翠羽風慘落金鈿
無復毬毬舞空餘憔悴眠
縱令化為血不續舊琴絃

夏晝

當軒嘉樹午拂幙好風涼石几龍涎細磁瓶鳳爪香掇
詩題扇紙試譜解琴囊底事巢簷燕飛飛上下忙

見孤雁

雲海樓遲樂何堪又自鳴一天星月夜兩地弟兄情松
葉山廬靜蘆花水舫輕相看成昨夢惆悵若為平

訪敬所出山留別

嘉會幾三日離情更一杯好山看未徧閒客去還來素
壁留詩草清風贈隴梅海天今夜月相對若為懷

輓海州林學士

吾道人千載空山草一丘無書上封禪有子紹箕裘
高館芸香老疎簾鶴影秋清風不可邇雲樹暝悠悠

舟中

萬事數杯酒百年終日歡移舟白石渡著屐蒼煙巒秋
色連空碧潮聲入夜寒客懷轉無賴俯仰一長歎

江上

自慚疎拙甚十載誤朝簪欲向江湖去難忘雨露深
逢

人無白眼報國有丹心多病愁偏絕樽前任淺斟

五王遊春圖為朱揮使廣題

繁華池館艷陽天鸞鳳笙歌列綺筵金塢日融花對笑
玉欄風暖柳貪眠內家長是三千歲小酌休論幾萬錢
歸騎莫貪鷹犬樂桑麻陌上盡春田

進香之京別文範文明弟

思親長起望雲愁遊子今朝更遠遊鄉思一天閩海月
羈心兩地潞河舟黃綢被冷分書幌青草詩成付酒甌

出告已題封札在雁來須寄故園秋

綏城北戰士枯骨如莽予收而瘞之誌以此詩
白骨縱橫野水濱寒煙宿莽夜飛燐驚心鋒鏑生前事
埋骨風霜死後身予了遊魂毋作厲皇皇掩骼豈須春
居人莫損封丘土百歲一抔應與隣

懷劉水部

咫尺天台萬里脩桃花流水為誰留望邊雁影青山暮
吟裏風聲碧樹秋好憶西湖歸放鶴休因七夕恨牽牛

棚陰一斗松香酒不換長安萬戶侯

劉水部臨別索詩不成別後寄此

寥落正當多病後心知又是遠行時縱教強飲難成醉
勿訝臨歧不賦詩風雨孤舟人去遠雲山千里雁來遲
依稀博得西窗夢幾度松亭對酒卮

過彭澤縣謁陶先生祠

五柳成陰落日遲百年祠廟大江湄若論作宰乍來意
肯緩休官歸去期典午之間無舊業羲皇以上有新詩

浮雲蹤跡寧無愧聖治今非處士時

輓新安吳處士

瀟灑林泉八十翁清名落落滿江東
碧梧枝老琴牀月白藕花寒釣艇風
舊社綺黃聯隱牒新盟秦晉託儒宗
那堪白嶽牛眠地煙樹長封一畝宮

登黃鶴樓

醉眸空濶楚天清獨倚危樓覽物情
江引巴渝歸渤海山延廬岳入荆衡
何年笙鶴雙僊會萬頃煙波兩岼城

赤壁烏林總陳迹臨風懷抱若為平

黃竹樓登眺有懷南雍三進士

江上危城城上樓沅湘東下水悠悠微茫見雁青山暮
落莫懷人碧樹秋碣石有文留勝槩壺觴無客續佳遊
廟廊萬里江湖晚四十年來半白頭

秋夜同應先生宴葉生胚挹翠樓

海上羣峰指顧中晴霄挂笏萃文雄小窗月色通松逕
虛幙煙光護竹叢五夜流虹生硯石半窗靈籟落絲桐

酒醒徙倚危欄上
江漢茫茫思不窮

黃田午泊

行舟暫艤港頭沙
清夢依稀又到家
正好承歡忽驚覺
數聲溪鳥掠蘆花

題畫蘭

翠袖衝寒暮倚樓
高山流水思悠悠
玉人何處空遺珮
月落滄江一笛秋

題畫石

授簡何年訪穀城叱羊無地覓初平曾如舣棹瀟湘晚
水落空江山月明

寄應復軒先生

先生家在鏡川東古木衡門一逕通不省海棠開幾許
欲携樽酒問春風

效唐人宮詞

金箔微開掃玉牀離宮瞰水竹風涼月華滿地笙歌沸
未信今宵更漏長

題商山四皓圖

誰道雲山歸路荒但聞軒冕世情忘悠悠出處渾難省
奇策安劉付子房

晚酌朗吟亭有懷陳德衡

朗吟亭上酒樽深風月娟娟愜賞心為憶元龍湖海士
何由共此朗然吟

早春

細柳纔黃嫩未絲已知春色到疎枝殷勤折贈行人別

莫待秋風日夜吹

張天顯

字敬中別號巽所畏齋公之子弘治辛酉舉人仕至大寧都司教授鄭少谷先生其

門人也

謁南山祖塋

陽春動地來芳原利幽涉梅花霧中奇鳥弄風前傑感
我雨露懷杯醪灌松葉再拜欲敬言山青澗泉冽

登高分得留字

歲功成萬寶灝氣澄三秋茲晨值陽九漫作龍山遊仰

翰天宇寬俯瞰長溪流悠然起松風蜚露沾衣綢拂石
坐苔花長嘯山泉幽興懷古人駕逸不可求夕陽送
鴉翼翠靄生林丘主人殊愛客折菊分詩籌狂嘯震岩
谷岸幘謝靈脩薄言歸路晚衣帶餘暉留

訪葉隱君山莊

偶訪雙溪潄坐嘯雙溪屋主人愛客情累日歡不足林
禽送好音野樹呈芳馥杯傳豐市醕盤列春山藪何當
蘭桂懷冠冕忘拘束香檀風外敲潦倒霓裳曲樂極自

忘形起向澄潭浴天風兩腋生瀟灑出亭毒天隨空五
湖康樂閒千谷人生能幾何常對樽中醪

聞鷓鴣示鄭繼之

行不得哥哥啼得寒煙漲碧莎楚澤幾風侵枕簟江州
一雨濕衣羅滿山松桂寧無穴萬里乾坤漫有回詩瘦
不禁愁徹骨傍蓬搔首思如何

行路難

太行之道出關西荆厓棘棧跨虹霓行人失勢推輪轂

顛崖絕坂難攀躋鳥聲相喚行不得草雲黯淡無顏色
道逢黠旅坐相談對面危機眇難測

又

吳城夜發寒山鐘牙檣銅鼓鳴天風挑燈拽纜百夫擁
愁殺孤舟寄溆東溆東漁父向客道紛紛勢力一時好
君不見東門黃犬無人牽市上屠沽笑絕倒

溪樓感興

水面無雲島嶼浮却疑鸚鵡有南洲驚濤濯彩明星落

急管入樓靈籟周萬里江湖憐病骨一天風物覺深秋
倚欄莫作悲歌曲溪上漁郎也解謳

浦城登陸路

建水西頭艤客槎驅車山徑鳥邊斜青嵐樹杪看朝巘
夕照城墻隱暮笳野色依稀垂帶草禽聲高下落岩花
解鞍為買壚頭酒坐對雲山興未賒

過嚴陵祠

白水人收赤伏符先勞物色索賢書暫休男子澤中釣

又駕狂奴館下車逐鹿臺前無鼎俎富春山裏有犁鋤
祇今風寢孤松樹猶似當年鼾睡餘

寄謝姑蘇顧朝列

舟泊吳門百尺樓樓頭雲物為君留香風繞座芰荷滿
涼雨入簾林麓幽庾亮雅懷非憚老陶潛有子更何求
離杯莫動陽關唱久客江湖不任愁

寄葉懷麓先生

夢入衡陽第幾峰蠻煙又隔海天東枕椰雨後枝枝綠

荔子風晴的的紅
紫牘不勞鷗近榻
吟樽有約月當櫳
臺江羌起香山社
便應淵明菊數叢

溪行見萱花草

鵲背風和露葉柔
多情相對更忘憂
雲山萬里頻回首
一片征衣百線愁

題小景

東風送雨入青原
一片花飛一片雲
中有幽人懷獨達
楚蘭歌徹許誰聞

張元秩

字經世，巽所公之子也。鄉舉，仕至寧波府通判，別號恒谷。

少婦行送王遵巖左遷

攬衣望明河，玉繩低回光。盤拏青松枝，白鶴來翱翔。妾夫自年少，意氣凌蒼茫。朝飲射洪爐，暮宿紫雲牀。白馬赤茸鞞，陌上何輝揚。妾本名家女，不解時世妝。羅衣白玉珮，素質瑞麟香。機頭工織素，一日二尺強。欲採園中葉，婦人不下堂。欲採陌上樹，原蠶禁柔桑。夫心凌風葉，向背苦不常。棄置在色衰，妾已悲年荒。征鴻報霜後，四

壁鳴寒螿婦人自有分料理夫衣裳

掃雪行

長安雪花如掌大朝回騎馬花為蓋玉宇瓊樓高更寒
荒原敗屋情何賴日暮天低酒旆愁雪煎一椀欺公侯
袁安閉戶胡為爾戶外紛紛埋馬耳市兒執帚除道忙
吁嗟爾腹朝無糧朝無糧勿復語爾不聞關西將士凍
欲死

西湖放歌行

西湖水清清見底浪暖沙暄雁雙起雁飛不落稻梁田
弋人慕爾徒紛然賈生磊落美少年才如羽箭乘風前
長沙宣室淚濺濺何如樂聖稱世賢禰衡之才能擊鼓
屈子思歸作漁父虔州酒稅名不虛至今文彩生圖書
深淵大澤藏龍魚西郊雲密將何如西湖水清蘆葉疎
胡不濬此芙蓉渠蠙珠或有當前車夜光不發空爾思
冬日遊海印寺

新寒凌翠袖散步入禪叢海印何年寺輝煌紫陌中煙

分兩岬潤霜滑一橋通可是浮圖麗玲玲倚太空

李雲岡

憐爾雲岡子飄然思若仙春風黃憲渡夜月子陵船留
滯江湖遠音書夢寐牽京華虛木榻遲爾未教懸

送雲泉嵩南二子歸閩

秋水下蘆溝芙蓉對晚愁夕陽共仙棹樹色望京樓結
綠黃金榼驂騮白玉鈎風塵迷驛路嗟莫暗中投

出郭

出郭聊行樂閒情轉自悲風霜驚歲宴客髮尚天涯老
穉迎暄立田園啄雀飢歸來掩書卷兀坐意遲遲

聞笛用北峰韻

笳曲傳胡塞流商悲至今鍾情涕淚滿別恨歲華深謾
按雌雄節誰傳子午音西風怨楊柳搖落客邊心

讀騷

此懷長不寐持以問乾坤銀漢無孤棹神龍有九閭詩
書終發冢戎馬未開門永夜歌漁父難招楚客魂

雨奕范菁山官舍

衝泥到官舍聽雨理楸枰疎懶機關少縱橫白黑生花
溝流水急草屋敗垣驚鷗鷺雙雙下知渠眼獨明

新晴與象庠諸生論學

採芹盤澗曲瀟灑客衣單雨淨潮翻白梅疎山更丹詩
歌鏗玉磬禮樂話金鑾辛與官滄海同君一食簞

泰陵陪祀

鼎湖雲繞竟難攀陵寢巍巍霄漢間玉匣光收龍虎氣

瓊欄斜倚竹梧斑中興猶落蒼生淚物候應悲聖主顏
陪祀儒臣哀獨壯蕭蕭風露下西山

孔庭古松

怪特孤松倚殿前風霜歷盡不知年寒聲瑟瑟喧秋夜
古色蒼蒼照暮煙勁氣在天元不老歲寒得此尚依然
人間草木爭奇縹憐爾光華俎豆邊

武侯原孝襲爵歸嚴書贈

碧溪溪上今風雨宿草難忘夢寐間獨傍雲霄看玉樹

依然神表立金山花明虎帳新生色日暖胡塵亦滿關
好伴青春敦禮樂漢臣名實重樓蘭

輓李鶴軒

白虎闌中羨阿郎歸囊忽爾思徬徨愁聞逸叟元裳鶴
已駕仙家碧玉房永夜月明舟壑靜空山雨冷竹蹊荒
少微星落詩筇卧寂莫煙雲鄭老鄉

和王晴川即事

朝廷本意備諸戎鐵騎長戈控大同豈為棘門成禍首

翻然鼙鼓動雲中
閭閻日暮風煙慘
冒頓天寒劒戟通
聞道總戎蛇鳥陣
列營祇在代西東

贈王伍二同寅陪祀

武皇陵寢接雲城
瞻掃真懸雨露情
長憶六龍回紫極
猶餘八駿繫朱纓
孤高陰殿含秋色
想像神威動遠征
宦孽已誅遺詔下
百年江漢淚縱橫

晨入太學追憶晴川昔遊情景惘然賦此

司直堂階落木陰
故情回首淚沾襟
清樽開處當明月

古調看人長道心寂莫獨攤嘉樹傳風流誰嗣廣陵琴
孤兒寡婦南歸棹萬里寒江煙霧深

聞浮峰弟言予候久不至

報爾辛勤訪老兄炎天七月到神京連牀擬共今宵雨
短燭猶虛昨夜明已辨霜刀飛鯉鱠更分春色倒銀罌
北堂喜佇南來目白馬今過第幾程

送姚子敬教錫山

嚴瀨論文意若仙長安笑語共風煙忽看此日琴書遠

未道他年夢寐牽
秦伯孤城秋樹裏
東坡小墅太湖邊
雄文雅節君須振
北雁南魚謾惘然

翠亭

小亭長日白雲浮
樹色平臨萬壽洲
童子近花能弄鶴
高人垂釣不驚鷗
松林含月娟娟淨
竹塢移樽事事幽
美爾阿郎能養志
亭前玉珮韻脩脩

送方平洲節推廣州便道省覲

輝輝海日白雲城
萬里寧親共此行
南國煙嵐明墨綬

窮荒日月寄書生
亭開遲翠松筠好
官近羅浮夢寐清
旌節入疆如問俗
陽山兒子總韓名

送蘇雪江任桂林

湘灘流合始安州
落日千家煙火浮
天遠星辰聯貫索
山空雷雨動窮陬
異魚水漲湖塘月
金粟花明楚越秋
簡訟只今懷舊俗
韓公閉閣合深憂

寄鄭沙村

不見平生鄭東谷
越南春色動遐思
堂齋衾枕當深夜

霄漢經綸看此時九野雲浮淹遠夢四明花發滿寒枝
多君愛我真成癖到處逢人說項斯

送浮峰弟

西北天高風色寒少微旌旆出長安
襴衡才大能岑服杜老名高合鵬冠
春草幾移風雨榻垂楊又據別離鞍
征衣縫處憐遊子斜日孤雲細細看

秋興

山東河道荷戈行聞說滄洲亦募兵
守令未遑圖保障

將軍誰復作干城田疇禾黍悲羣牧天漢星辰應列營
節鉞急須籌上策君王西北重憂情

七里潭邊繫孤艇幽棲長傍子陵臺潮平風急魚龍動
木落星寒天地哀揚子交情能問字山公具眼解憐才
勝遊舊事今如此獨夜凭欄聽落梅

石門洞口少年過之子青雲共浩歌樂處江山惟夢寐
舊時風雨竟如何混元獨立招玄鶴甌越相携訪白鷺
二十餘年一回首秋風蕭颯淚滂沱

月夜飲歸同凌王二丈

星月熒熒度禁林，長安歸騎共知音。
天機萬古馳昏曉，薄俗何年謝陸沈。
縹緲風煙明靜夜，支離事業愧初心。
梁園漢苑皆才俊，珮玉橫金少滯淫。

春日同北峰登鏡光閣因訪闕上人，不遇觀盆。

中素馨

此日同君登快閣，溪山正是放花時。
故鄉異藥驚愁眼，終籍農人治遠陂。
禁苑峰迴瞻日近，蘿房春靜見僧遲。

巾鞋幸少泥塗累拄杖穿雲隨所之

遊金我寺

桐梓花繁春事過看山中屨入金我飛飛瀑瀉哀徽切
渺渺雲征遠岫瞻短褐溪翁供紫蕨長竿穉子浴黃鸞
今人指點流傳賦盧橘柴扉已滅磨

輓王晴川

平生雙眼無長淚淚到丹旌眼欲枯渺渺江山回獨鶴
淒淒風雨泣雙雛地曹事業青冥上司直聲華北斗孤

後夜思君憶顏色半庭寒月在蒼梧

輓月塘

文星此夜掩寒光門巷雲閑草色荒
秋浦祇應哀落雁春堂空復靜琴張
孤高古道懸山斗江海歸雲度渺茫
賈誼平生懷遠志竟將流淚謝君王

石倉歷代詩選卷四百十二

欽定四庫全書

石倉歷代詩選卷四百四十三

明 曹學佺 編

明詩次集七十七

劉珣

山水圖

老龍夜泛東溟側洶湧西來成劣削層巒疊嶂護蒼煙
浩蕩江湖凝黛色垂流飛瀑交琤琮山光水影含姿容

漁艇縱橫遠復近飛鳥滅沒江天空方恨無緣結鷗鷺
畫中忽閱滄洲趣頗覺良工獨苦心天機盤礴精毫素
憶自混沌初開時乾清坤濁分兩儀其中消息杳難見
至今渣滓稱神奇畫工那知此吾儒應自識滾滾浮雲
變古今濛濛碧霧生朝夕嘗聞人世有天台又聞仙境
有蓬萊赤城霞嶺空崔嵬賣藥老生安在哉百年蹤跡
嬰塵埃軒車却畏清猿猜青山綠水應無媒日暮悵望
雲裴回安得長風九萬里明月五湖歸去來

題畫

四面芙蓉挿天表千歲喬松青正好落花流水景中人
石逕迂紆車馬少茅堂八柱盤其間瑤窗大敞門不關
蠟燭宵然騰絳燄珠簾暮捲對南山南山有月明於鏡
主人心事澄波淨回頭看月看不休古月今人那有定
月兮遠看如朦朧近看豈異水晶宮我願我心同此月
絕無纖翳存胸中

古栢寒泉

徂徠山中有古栢枝柯千尺連雲碧鱗皴偃蹇龍蛇姿
孤直深為人愛惜廬山山頭有鳴泉鳴珠濺玉白漫漫
青天一望在水下浪花洶湧玻璃寒栢兮泉兮何清潔
品花澗草難同列眼前此景非人世雅稱中宵對明月

三老圖

此石有古意此泉無新聲此松生來已千歲歲寒三老
同為盟我昔西上崑崙頂濯足滄浪千萬頃東看秦嶺
五大夫枯枝亂走蒼虬影歸來貌作三老圖生綃一幅

雲模糊有時挂向素壁上胸中一點塵氛無

紅梅圖

天生本是冰霜姿縞衣不受纖塵縉何事東君厭清素
一宵幻出珊瑚枝園林陡覺春意別千株萬株飛紅雪
莫憐醉骨已如泥要使丹心常似鐵

騎牛圖

三月山城雨初霽林木陰森足人意萋萋芳草高原中
溶溶流水蒼苔際而此遊者屬何人蒲山公子龍蛇身

漢朝四百年間事黃牛背上書聲頻聞來一鞭擊牛角
懷抱紛紛常作惡東都有策萬言多大事難成終落莫
我觀自古大丈夫遺臭流芳真兩途乃若元邃深可歎
千秋徒把青編汙

四皓圖

層巒萬仞高如矗雙玉泠泠瀉寒瀑長松不改四時青
瑤草琪花競芬馥憶從辭家避祖龍當年歲月隨冥鴻
山童已報花成實仙籙未啓雲為封枯棋三百勢難測

一著全羸歸羽翼喚醒當天老赤虬坐令四海噓炎德

山水圖

東臯東望山嶙峋山頭霞綵明朝曛鷺鷥數箇白如雪
點破空青萬頃雲重重綠樹波光裏波光浩渺過彭蠡
中流一棹者何人蒼茫似畏西風起點點簡舟中舊所藏
莫教墮落風濤鄉風濤初不在平地斯人回首何遑遑
我皇聖德齊天壤太平治化原無象來往登山航水人
萬里安行如席上

畫鵠

畫漏沈沈下高閣簷簷半畝香雲合太湖石畔水澄澄
滿貯金盆浴飛鵠鵠性由來最易馴羽毛鮮好堪怡人
雪翎烏尾錦作背畫工畫此何太真記得當時王相會
一放一祝三千歲繫足能傳子壽書入懷那解司徒貴
一朝賈客便生涯盤旋隨上滄溟槎任教年來復年去
萬里還歸舊主家

山水畫

層巒疊嶂高嶙峋青溪碧澗波粼粼堂亭寺觀不知數
市廛隔斷無纖塵迢迢有客泛孤舫一葦凌空放雙槳
儼如仙子御風行煙霧中間互相訪依稀疑是終南山
坐者揖者咸衣冠採藥每將巾寫濕共談那解天壤寬
是誰好事留斯跡安得其間一棲息瞻彼春空一片雲
為霖有意人難識

大魚圖

長風駕海崢嶸立百川如沸天吳泣赤鯉橫霜怒浪掀

三十六鱗當水擊揚鬚鼓鬣開鴻濛凡介常鱗應伏匿
乾坤浩蕩古今浮煙雲咫尺風雷夕葛陂竹化事無憑
豐壤劒沈人已昔琴高跨背亦渺茫子英騎角空騰躑
何如錦鱗三月春桃花浪暖速雲津天下蒼生望霖雨
一朝變化蘇呻吟

文會軒

三槐後裔皇家客瀟灑襟懷美風格生平雅好殊尋常
不向繁華尚清白禁城東面都衢西高居大廈連雲低

就中一軒號文會子史經書羅四圍明窗淨几絕塵俗
奇花異卉堪娛目五侯七貴追逐來學士先生常寬宿
酒有羅列開綺筵濶論高談無後先不知方來千載下
不知盤古羲皇前歌詩翰墨成淵藪篆籀鳥跡雜科斗
鍾王筆法鬼神驚晉唐繪事無不有東君坐卧不此移
朝回退食無閒時歌罷鳥鳴歌麗澤芝蘭誼重芳名馳
我居黃扉密勿處可憐此會未得預張良范蠡笑人癡
行應參透黃梁趣

竹

自古高人偏愛竹常向軒前看未足眉山蘇子筆如神
洋州老可曾相熟東魯藩垣有卯君等閒濡染生煙雲
儼然如到嶰谷上金刀截斷蒼蒼紋莫說淇園春雨霽
此君在在增佳致帝子啼痕色尚斑丹陽逕造留深意
三更月上照寒陰孤稍化出虬龍吟世間草木敢相抗
直節清風照古今

大韶山水圖

江南之山倚南斗根據蜿蜒幾千畝懸厓峭壁重復重
若坐若立還若走江南之水環南都洶湧周迴為具區
包天括地深無極雲帆雪浪相縈紆水流山峙多清氣
鍾出高人自拔萃平生愛住山水間養高不為形骸累
崑前空翠飛濛濛小橋不與周達通房櫳半出長林外
人聲多在雲煙中好景靜觀皆自得著書老却龍鱗栢
昨夜虹光射斗牛山靈放出文章伯獻策御前誇第一
詞林更轉春坊秩莫將山水匿胸中普施霖雨蒼生筆

太常簿劉明遠山水

奉常司幕吾宗裔愛水愛山兼愛字手持一幅驚溪絹
或濃或淡煙雲氣遠看淡淡近看濃暮山紫兮曉山紅
一灣楊柳依稀外無數人家杳靄中平橋過去波濤惡
何處舟來無住著空青萬里炯雙瞳汀花岼草今猶昨
林巒深處開茅堂四時佳景非尋常吾宗依此有新構
左圖右史羅中央八窗四面皆真景歌罷滄浪動深省
門前車馬任紛華還我胸中常耿耿

山水秋景

銀河倒挂青山頂，蒼虬偃卧芙蓉冷。
煙巒深處起樓臺，雙雙人在蓬萊境。
我觀斯人非避秦，韜輝伏耀全天真。
盍簪愛話無生事，恐教名利縈茲身。
霜葉林邊秋色映，桂花香裏行厨淨。
彈琴惟取古為音，漉酒還將清比聖。
逍遙此樂人間稀，潔已由來世所譏。
只今四海皆樂土，不羨羊裘釣石磯。

王舜耕山水送任章南遊

世傳南畝丹青好筆底天機不草草疊嶂層巒點染間
咫尺芙蓉挿晴昊白雲漲雪落溪中溪流宛與仙源通
波光水色互掩映煙霏霧靄紛濛濛雞不鳴兮犬不吠
山人不識王侯貴茅簷旭日上三竿借問此時曾起未
一聲啼鳥春晝長門前綠樹森成行竹籬苔徑輪蹄絕
臨風坐落松花香蒲東任君有高致此景分明在胸次
人間山水已熟看只今又欲浮淮泗淮南山水天下奇
我生時時夢見之少年失脚紅塵裏縱有高懷何所施

幾時得共任君約西上崑崙東岱岳滄溟灔澦徧遨遊
半世塵纓須淨濯

山水畫

江上好山開畫屏山上古木參空青飛流直下幾千尺
征鴻南去秋冥冥津口誰人遠呼渡桂楫搖搖那肯顧
飄然謝却利名場海濶天高何所慕君不見輪蹄袞袞
紅塵中五侯七貴徒其雄何如此客滄江上一曲高歌
山水風

夏日即事

紫禁沈沈清晝永
天上蓬瀛隔塵境
春風披拂萬年枝
玉砌葵花傾日影
九重勤政念羣臣
親見恩波出內頻
綵縷五文頒煥爛
朱櫻萬顆賜圓勻
荷開太液香迎輅
幾點閒鷗紆聖顧
詞林擬獻清暑歌
尚方又進金莖露
小臣飽食荷恩光
正憶鋤禾農父忙
田間翹首望霖雨
願借天瓢灑萬方

松亭避暑

燭龍南來正亭午赫赫炎威徧海宇洞門任是絺綌輕
揮扇難勝汗如雨維時鳳輦出彤闈一亭暫憩光霏微
陰森五鬣搖朱戶滿前忽訝蒼龍飛清風時從天外起
清氣重添綠陰裏憑軒頓覺炎焰消襟抱倏然涼似水
玉壺澄澈瀉冰漿沈李浮瓜興味長願裁巨榦成大廈
盡庇四海俱清涼

海子觀魚

太液春回水欲泮東風暗卷流澌散赤欄橋外新雨過

巨浸微茫接銀漢曉日晴分蘋藻煙落紅蕩漾隨清漣
遊魚作隊不可數與波上下情悠然波間潏潏鱸與鮪
亦有鰭鱗兼鱣鯉皇心見之良獨怡更命瑤牀近寒泚
太平時節生意多物情應與人心和周文沼上樂於物
千載靈臺同此歌

御堤煙柳

東風二月午門曉紫禁暄妍暖雲繞玉河堤畔赤欄橋
高柳依依得春早柔條裊娜百尺垂蘸水點破青玻璃

晴煙一抹鎖深碧曉色正與春相宜臨風忽報黃鸝轉
入望濛濛無近遠鮫綃帳薄疑未收翡翠簾輕不堪捲
日高頻覺散清陰無限韶華連上林紛紛萬卉足生意
自是皇家雨露深

夜月聞砧

八月九月秋氣高長林落木風蕭蕭白苧秋深不堪著
輕寒欲試新剪刀城頭霜飛露華濕城下寒蛩啼更急
當戶誰家搥練聲風高不礙重城入千杵萬杵聲未停

已知力倦心忡忡天清月冷幾人語塞北江南今夜情
不怨搗衣寒苦早惟願著衣人不老萬里歸來未有期
昨日官家頒絮襖

中秋賞桂

秋風瑟瑟天宇清三五良宵秋氣平嫦娥捧出玉臺鏡
山河大地增光明廣寒彷彿開宮殿桂影團團月中見
霓裳一曲聲珊珊疑是瑤池啓華宴銀蟾散彩流霞觴
金粟萬斛來天香清景邀人不成寐詩成月落參低昂

吁嗟仙種自開闢分付嫦娥好培植莫遣吳剛得浪侵
留取清芬播無極

松逕秋聲

紫苔繞逕塵無迹鬱鬱高松挺秋碧金氣正驕風滿林
渾如萬壑波濤激又如曉日蛟龍吟翠雲蕩漾江中心
倏忽風微更堪聽冰絃操出重華音蓬萊宮闕五雲渺
鳴鶴寥寥動瓊島鸞與時作靈臺遊應喜秋光在林杪
風停聲歇天宇清政成刑措當昇平玉署小臣拜恩詔

作詩媿比歐陽生

元夕觀燈

禁城午夜春濛濛
火樹照人如鏡中
六鼇移山向瑯島
紅鸞下繞明光宮
條風東來送新暖
低颺香毬動黃繖
九重金闕倚岩堯
四面紅雲簇簫管
宮闈更欲親承歡
綵綳十丈空中攢
隨山移仗不知曉
應制還催供奉官
五朝故事傳來久
樂與民同上元酒
想像先皇得衆心
尚有燈詞播人口
太平喜是百載過
邊燧不驚天氣和

古來張弛皆有道賞心一日非為多

東風解凍

去歲都城三尺雪御水潺潺凍全結半夜春從地底回
一片菱花暖初裂東風著水水不知縠紋細細搖清漪
退朝閒步石橋上流澌半入昆明池柳眼初青照堤岍
蕩滴波心影凌亂青陽杲杲射員沙幾簇魚苗聚還散
太乙東皇隨斗行韶華拍塞皆春聲臨流攬勝心獨喜
物色變態如有情天潢自是得春早坐想八方春更好

航海番人入貢來萬里川光淨於掃

芝嶺春雲為楊維新賦

醉把仙芝看商岩采處頻翠莖猶帶露紫葢不需塵豈
是充饑物端為上壽珍玳筵雲不散共祝百年人

輓國子丞侯丕先生父

見說遺菴老常年卧白雲詩吟長短句書閱古今文遺
行人間重褒章隴上焚橋門有賢嗣師道續河汾

柯谷耕雲

買得柯山百畝雲春風谷口樂耕耘牽牛人向村前去
扣角聲從隴上聞野鳥祇知催布穀隣翁不解誦移文
向來方寸多餘地留與兒孫次第分

王維瞻塔山歸隱圖

白髮催人不肯饒辭官歸去伴漁樵青山如畫曾相識
黃鵠高飛未可招束我舊書還舊隱看他塵世競塵囂
池頭有子當年少染翰時時獻帝堯

輓成國公

卷四十四
四十餘年列上公春風細柳見英雄曾將劒戟扶明主
慣擁貔貅任總戎名播斗南層漢上魂歸塞北遠山中
只今史館多才俊解寫凌煙第一功

送戶曹正郎馬兄德源之宣府管理軍儲兼東

殷都憲

堪嗟一別隔三春王事驅馳不顧身休訝胡塵飛漠漠
只教邊廩積陳陳皇華北首憐君苦白雁南來慰我頻
煩語故人殷總制屋梁斜月數傷神

送劉世英南京太僕

鴻臚傳罷第三聲從此朝臣識俊英
東觀紬書前太史南雍造士少司成
已聞舊學名方著正愛環滁景最清
當宁賜麻應不久暫將罔命命先生

送浙江僉事劉餘慶

黑首承恩白玉階外臺元自內臺來
都人尚識風霜面朝士同推梁棟才
獨鶚飛時秋氣肅雙旌行處瘴煙開
旁衣猶是朝中賜不着東南半點埃

贈景昭叅政江西

朝回共我數飛觥最喜黃門有盛名
草到奇時鸞鳳舞吟于苦處鬼神驚
近來猶誦匡時疏遠別難為倚玉情
後夜相思凝望處文星高照豫章城

送岳方之興化

翰苑同年少一人城東出祖倍傷神
高才雖不登樞要清望端能動縉紳
西徼歸來緣有命南州謫去果何因
嗟余久負容臺祿擬向林泉老此身

送徐仕亨復任荆門

二十年前已識荆
荆州今復去專城
柳條解綰離人恨
河水長流故舊情
闕下有人推孺子
江南到處說徐卿
也知騏驥終騰踏
高駕雲車天上行

慶致仕閣老商先生壽七十

當代明經第一人
強年高步上星辰
錦袍玉帶兼三秩
白石清泉度七旬
謝却鈞衡娛暮景
歸來桑梓樂長春
茲辰茲會遙相憶
南望南天祝頌頻

送光祿寺卿李君之南京兼柬王宗貫

而我相交三十霜，長年聯珮遙駕行芳隣。
舊接金門右，尚寶常擎御座傍。
最喜遷官符衆望，更憐將母過仙鄉。
南都想會王司馬，雲樹相思不暫忘。

題扇

班姬新製剡溪藤，似玉無瑕雪有稜。
五夜蟾宮開半壁，三冬鮫室剪輕冰。
裁于用舍諳時態，人向炎涼有愛憎。
為喜清風故人意，幾回題贈愧無能。

贈授業劉先生致仕還吉水

秋到梧桐暑氣清
摳衣隨步出都城
五千里外思鄉夢
二十年前立雪情
栗里有人邀社飲
海鷗何事傍舟行
從今不上紅塵路
坐看諸郎學鳳鳴

安溪僑叟為張簡討賦

溪上茅茨屋數椽
春雩秋社自年年
窗含鼇背千峰雨
簾捲波心萬頃煙
柳邇有時緣客掃
竹牀長日抱雲眠
白頭自分無人識
不解詩名到日邊

送秦觀郎中叅政雲南

眼底羣僚獨數公
除書又出大明宮
人辭薊北層霄近
路入滇南萬里通
荷葉擁舡秋滴露
桂花明旆晚生風
逢時已自叅藩省
好竭丹心答聖衷

題王宗貫西園清隱

出郭西行二三里
園林佳處足投閒
軒開紫陌紅塵外
人在清風明月間
當面好花開簇簇
繞牆流水響潺潺
笑他名利場中客
到此能無一愧顏

一鷺圖

芳草垂楊蔭碧流
雪衣公子立芳洲
一生清意無人識
獨向斜陽歎白頭

劉時用枯木竹石

蒼龍夕挂千尋影
彩鳳朝聞十里音
月夜風朝我曾見
太湖石畔蘚痕深

小景

羅浮夢斷夜窗虛
一曲焦桐樂有餘
從此南枝消息到

梅花如雪徧庭除

山禽

滄洲深處獨依依
覓食秋原飽即歸
塵世小兒偏害物
等閒休向五陵飛

魏時敏

莆田人有
竹溪集

塞上曲

笳鼓起城頭
烽煙上戍樓
風旗翻朔霧
霜劍帶邊秋
瀚海兵聲合
陰山殺氣浮
不因橫絕漠
何事更封侯

塞外秋塵起關中夜柝聞連營通漢水擁騎入邊雲月
照琯弓影霜埋古劒文軍中振奇策奏凱報明君

秋來霜滿塞天迥雁臨關白骨沙場裏黃雲隴水間草
荒鷗影疾烽靜戍煙閒日落邊城暮將軍獵未還

萬里烽煙淨三邊雨雪晴暮笳清有韻寒鼓濕無聲鐵
甲埋霜重金戈映月明旄頭看漸暗四海樂昇平

除夜有感

迢遞離鄉國蕭條感歲華宵聲悲鼓吹月色浸梅花殘

愁中盡流年夢裏加親闈千里隔回首重咨嗟

南溪為許上舍廼弟題

高人真雅淡卜築傍幽溪碧草侵階長青山入戶低華
源應咫尺流水自東西讀罷無餘事春風聽鳥啼

山水圖為錢塘周士廉作

佳氣接蓬萊衡門掩綠苔山深雲自合江漲浪初回帆
影歸漁浦灘聲落釣臺畫圖殊有興千里共徘徊

秋夜有懷寄楊大使

孤館涼風發長天白雁過旅魂秋易斷鄉思夜偏多野
曠雲連樹江寒月浸波不知揚子宅秋興近如何

皇都別意送張主事外父還蜀

送客出長安離懷不可攀纔傾燕市酒又向蜀江還烏
道寒雲裏猿聲積雨間家林應有待松菊繞南山

寄徐齊紈

旅館秋風早官城樹色微長天南雁盡尊酒故人稀落
葉鳴幽戶寒蟬噪夕暉相思何處是惆悵暮潮歸

送泉上人歸眼明寺

遙入圭峰寺長吟送遠公
經翻蕉葉古雲散竺門空
飛錫臨天外看山想洛中
不知禪寂地松偃幾枝東

樵樂

礪斧臨溪石尋山度嶺雲
林深芳樹合澗轉野泉分
細語聽猿嘯狂歌散鹿羣
不知城市裏何事日紛紛

貧交歎

閒居無客到寂莫掩衡茅
官懶終成癖家貧易絕交
柳

殘鶯不語松老鶴還巢世事皆如此何須賦解嘲

題寶珠菴

不到曾遊地如今又幾春雲歸雙樹老門掩一僧貧
潮水寒侵岼沙村夜見人清樽誰是伴喜有霍家親

送朱琴友之戍海南

携書兼帶劍未必事班超暫向天涯去休辭故國遙
蛇珠生暗隴蜃氣積寒潮別後知相憶琴窗謾寂寥

題湧泉巖

再入招提境蕭條異昔時流泉分古澗荒蘚上殘碑門
掩花空落人間鳥不知那能招惠遠重與話心期

建溪即景

山春雲漠漠溪晚雨霏霏投驛經村店防灘識釣磯客
情隨路遠鄉念去人稀寂莫芳林下漁郎摘笋歸

輓平城王戶侯

唾壺敲未缺華表鶴重過一將英雄盡三軍感慨多城
笳悲落日營柳掩閒戈戎馬經行處空聞野鳥歌

送遊學人歸德化

曾立程門雪如今易已東愧無隣舍酒獨送海天鴻
村迥梅花白林疎柿葉紅他年看二阮霄漢醉春風

終慕

西墅頻勞夢北堂久不過夜寒蟲蠹簡春冷鳳停梭
草木傷心盡江山灑淚多焚黃應有典早晚到岩阿

送歐司訓之潮州

共喜之官處離家路不遙雲連閩嶺樹城壓海門潮
村

暗榕陰合江晴鰲氣消故鄉舊知己大半是同僚
清得廣文擅貧無負郭田欲償沽酒債只覓賣文錢書
卷消長日才名稱少年定知潮海上買盡剡溪箋

山水圖

看畫情偏遠題詩興不慳漁舟歸晚浦僧舍隔秋山樹
色微茫裏鐘聲杳靄間何年謝塵鞅結屋此中間

龍泉古剎

石罅久潛龍泉鳴古剎東秋燈林影外夜梵磬聲中縱

醉同陶令談經憶遠公題詩舊塵壁休用碧紗籠

石印回瀾

鵲化曾推的遺踪今尚存累累封曉霧泱泱浸雲根晴
影秋臨棹寒聲夜到門政成尋舊隱洗耳聽潺湲

送人使朝鮮

雙旌擁使車雲海舊方輿異域孤城小元菟萬里餘久
諳中土語兼讀大唐書會見承恩後瞻星拜玉除

和劉一能除夜韻

梅花送殘臘草色報新年客夢雞聲裏鄉心雁影邊
隨時事改酒為故人延却憶滄江上蘆花隱釣船

百樹送青六景為鄭侍御題

石罅無樵採春深剝綠苔孤雲將暝去羣樹送青來
晴靄琴書潤陰森鳥雀回醉吟看不厭何處有蓬萊

石姥晴雲

曉霽雲飛濕山高鳥度遲客登石姥嶺人禱偃王祠
嵐氣分晴靄林光淡碧滋何年一臨眺磨石醉題詩

江村沃壤

積雨暗江村溪聲到處聞
幾家依綠樹千頃熟黃雲
負郭真堪比汶陽何足云
東坡今寂莫稼說有移文

和王文偉韻

玉宇淨悠悠山河一氣秋
鐘聲林下寺燈影水邊樓
老去仍青眼吟多易白頭
還思為客處梧桐雨滴鄉愁
好景亭前月宜休苑內秋
有田皆種秫無竹不當樓
楓落思吳下梅開憶隴頭
明年花發處一醉破春愁

水南絳帳和鶴洲主人韻

故老傳經日諸生立雪時
餅香人送酒門響客催詩
白髮經秋短青燈坐夜遲
河汾有遺稿讀罷一興思

寄周鶴洲太守

風雨越江邊郵亭對夜眠
鄉心孤島迥客夢一燈懸
論舊懷他日談詩記往年
離魂將別夢幾度到臨川
村居掩薜蘿歲月易蹉跎
五馬經年別孤舟幾日過
雀聲喧白晝鷗夢落清波
誰在黃堂上同聽五袴歌

琴尊度歲華清興浩無涯野寺多逢竹江村少見花沙
浮鷺立鵲池小聚鳴蛙欲向金門去雲山路轉賒
未去畊南畝先來卧北窗詩清秋入寺酒渴夜臨江雲
樹思千里煙霞滯一邦離心將欲寫安得筆如杠
江鄉無舊業霄漢有新知身病仍耽酒家貧易廢詩梅
開人別久書寄雁來遲寂莫江樓上孤懷動遠思

寄姑蘇劉欽謨史館

倦翮已投林清風醒醉吟江沙粘野艇樓月照秋琴泉

石盟方固朝廷恩更深何時得乘興移棹過山陰

送吳使君服闋之京

柳色映離筵春陰咽管絃孤琴曾入蜀雙旆早朝天
老有匡時策貧無負郭田隱之流澤遠重見詠貪泉

離亭對綺筵把酒聽鳴絃路轉橋妨馬江浮水接天
漁村晴曬網畚火暖燒田只為蒼生出無心問酒泉

題羲之墨沼圖

風流晉右軍千古播清芬羽客鳴寒磬幽人坐白雲
鷗

波生筆陣墨沼亂鶯羣却笑曾書破羊欣白練裙

閒居寫懷

獨賞寒芳老紅花意懶簪世途輕白髮交態重黃金誰
著謝公屐來聽叔夜琴乘春尋酒伴臨水滌煩襟

江流天地外山色有無中

林亭閒寄傲極目浩無邊山歛雲藏樹江浮水接天征
鴻歸楚塞斜日下襄川留得山翁醉清風幾百年

凝秀軒為新安人作

地接古新安人間樂考槃溪聲當坐聽秋色捲簾看小
逕留殘靄遙峰生暮寒扁舟會乘興應與結詩壇

市樓春眺

危樓逼星斗帶郭亦山林雨歇晚峰淨湖平春水深落
花增感慨明月憶登臨欲讀高人傳塵埃滿素琴

西墅看雲


清曉臨西墅白雲生遠峰濃陰遮逕竹輕靄落庭松帶
雨隨孤艇穿林翳晚鐘倚欄人不見清絕聽鳴蛩

和卓德新韻

雨歇晚峰淨橋平秋水深賓鴻江上字楊柳笛中音對
菊須傾酒思山欲借琴故人重聚首為我細論心

送陳生之博羅省親

為客經漳浦寧親入博羅地蒸花木異峰斷水田多彩
服乘春著新詩對月哦先賢有遺跡珍重拜東坡



石倉歷代詩選卷四百四十三

欽定四庫全書

集部

石倉歷代詩選卷四百四十六至

詳校官編修臣謝振定

侍讀臣孫球覆勘

總校官進士臣朱 鈐

校對官中書臣汪學金

謄錄監生臣王兆溫

欽定四庫全書

石倉歷代詩選卷四百四十四

明 曹學佺 編

明詩次集七十八

李叔玉

題畫竹

君家碧疏見清影別是一段淇園秋何人筆底得天趣
云是東吳夏瑞州瑞州胸中竹如簣一枝一葉良可惜

却笑蕭郎技癢時手戰眼昏頭雪白興來雷從地中出
萬籟須臾起蒼壁翩遷彩鳳羽欲墮偃蹇青虬勢安敵
仙郎何以得此幅邀我題詩記真跡醉後操觚一揮灑
不讓王維有聲畫公餘坐對夜深時明月清風不論價

草庭卷為嘉興周生題

一室窮年究六經春來芳草滿閒庭暖隨霽月侵空翠
晴轉光風拂幔青酒趣每同生意好詩懷曾逐夢魂醒
瀟溪鼻祖相傳後千載雲仍紹德馨

東嵐秋思為江田謝家題

東嵐別是一人寰
烟水蒼茫島嶼間
猿嘯空林朝霧薄
鴻歸斷渚夕陽殘
漁人尚識桃源路
樵子還尋石室山
桑梓別來今已拱
不知遼鶴幾時還

題愛閒卷

羨子中年即愛閒
了然榮辱不相干
休官彭澤思陶令
載妓東山憶謝安
坐久白雲生半榻
睡醒紅日上三竿
蹇余賸有烟霞想
自愧功名脫屣難

送陳永祥之惠州太守

棘寺祥刑屬老成至今輿論誦持平
舊時傾蓋投交好此日分符沐寵榮
鳴珮曉辭雙鳳闕揚帆秋度五羊城
知君志操懷清白一幅冰綃贈遠行

淮陰漂母墓

古墓荒蕪何處尋青山隱隱帶淮陰
當年不進王孫食此日誰知漂母心
芳草斷碑秋寂寂斜陽低樹晚沈沈
登臨一奠懷今古醉倚西風動越吟

六平山

九日秋高日尚炎六平山水聳遐瞻喜茲洛社賓朋集
愛此林泉吏隱兼濯熱忽臨東澗曲登高直造首山巔
菊花燦爛盈頭插蓂莢離披衆手拈張旭三杯聞大笑
太邱羣子奮雙髯廣文磊落襟懷爽學士風流酒令嚴
石鼎聯詩茶共啜瓦爐煎酒火頻添不須公子調冰水
安得佳人露玉纖鶴唳千崑秋霧薄松號萬壑晚風恬
樽前丹桂飄金粟石上蒼藤掛素蟾此會明年誰最健

勝遊今日我何厭從教月色隨人影不覺涼颼墮帽檐
記取六平同賞處老夫應合誦陶潛

附陳鈞

字德衡閩縣人成化中
歲貢訓導有蕉軒集

送羅殿元倫復京

朝擢龍頭第一人除書夕捧下南閩
荊州幸識非常士宣室翻思放逐臣
視草每尋宮燭夜看花重醉御林春
祇今要路無榛棘長策君門自在陳

友人鄭鏘客久不歸却寄

遠遊欣撫一張琴曲盡寧無百感侵白髮倚閭慈母淚
華箋擇句故人心幽尋不必題凡鳥卧病猶能賦上林
明日柴關誰復掃莫教天外歎秋深

過九鯉湖即景

草色行亭徑路賒數聲啼鳥舊烟霞千山雜出雲邊樹
一水長生澗底花石鼎丹成猶伏火瑤臺人去不思家
尋真幸借天風便何異當年漢使槎

明妃出塞

淡掃蛾眉出九重徘徊馬上顧飛鴻月賒金屋繁華外
雪滿檀廬朔漠中若使稽圖刑畫士何如申法戮元戎
黃雲青塚空埋玉終古香魂返故宮

呈陳獻章先生

洙泗源流一派東若為山斗仰文宗寫懷每見傾三峽
飛夢空傳到九重老去無心嗟失馬生來有志慕乘龍
聖賢物色浮雲外何事當年祿萬鍾

輓李忠先生

蚤折天香覲九重一官遙拜赴黉宮江城慣識馮唐面
俎豆難收李廣功白社無期延酒聖青襟有恨失文雄
屋梁月落懷人處不見魂來楓雪中

逢中別李景和

客邸相逢不盡歡倥傯別我壯心寒可無魚水應難比
縱有鶯花也倦看廿載劉蕢猶下第三湘賈誼未還官
丈夫本是剛腸者對此呻吟淚已彈

送李景和改任夔州

人生飄忽百年間此別聞歌思渺漫我顧一身如在客
君當萬里獨之官行期不計巴山遠歸夢何妨蜀道難
縱有猿啼嘲宦況更無清淚滴欄干

夜宿平遠臺有懷德海上人

鄭谷詩臺曠賞音遠公臺上復追尋當年假館花同醉
此日敲門竹共吟風細爐烟浮下界月明經梵出叢林
虎溪別後登臨少雲水懷人隔古今

感今傷古為故人鄭汝實作

世事浮沈與屈伸
英雄幾見困風塵
漢灰零落中山裔
宋鼎流移瘴海濱
天道無知長吉夭
人心有恨孟郊貧
停雲緬想行藏處
劒倚南桴看北辰

題林克韶巢雲亭

阿誰飛搆號巢雲
雲護幽棲趣不羣
際晚鉤簾來縹緲
乘時排闥見氤氲
江南有句應思我
隴上無言可贈君
對景豁然成一嘯
天光繚繞此中分

懷歸

無情歲月去如流，眼底蹉跎兩鬢秋。
不是馮唐元易老，祇緣宋玉獨多愁。
思家舊業如江燕，結社初心似海鷗。
明日長歌雲外笠，五湖添箇釣魚舟。

慰友人趙希實

纔騎竹馬逐兒曹，轉眼相逢總二毛。
顧我不才慙襪線，嗟君長病卧蓬蒿。
曾投月下陳遵轄，枉憶霜前范叔袍。
幾度倚樓天外望，桐江惟有客星高。

釣臺懷古

古臺斜瞰大江湄高節清風一釣絲
劍氣若依龍去久壘書應怪鳳來遲
狂奴故態君能識諸將中興我不知
回首英雄西漢士韓彭何事使人疑

謝祭酒林亨大寄書

身恩渾未報涓埃便把丹心變死灰
三徑秋容今在菊六橋寒思獨闌梅
鄙夫自是貪佳遯明主何曾棄不才
霄漢故人猶有意遠憑鴻雁寄書來

與李景和敘情

每因風景負幽期
聊折寒梅寄一枝
吳下阿蒙非舊日
郢中高曲即當時
聽雞走馬君須努
附鳳攀龍我不知
若使烟霞換臺閣
孟郊韓愈自相隨

咸陽懷古

六王圖像舊山河
萬里經營政自苛
牧馬健兒南下少
聞雞秦卒北行多
蒙恬事業知何在
賈誼文章信不磨
撚指光陰纔二世
沛人中唱大風歌

偕諸弟登方山

笑入方岩翠幾重
惠連羣從躡行蹤
平臨怪石乘奔馬
俯視長江見躍龍
花老仙源青嶂合
草深樵徑白雲封
興闌酒醒黃昏近
猶在蓬萊第一峰

天順改元

八鑾乘捷返南軒
重沐恩光賀紀元
周室山河歸正統
郭隣風雨鎖流言
青宮已見祥霓集
紫語猶聞大業存
慷慨不須歌玉樹
太平還奏舊雲門

寄朝李蘇州廷美

十里榕陰綠野堂
白眉青眼着腰黃
登龍意氣誰同轍
倚馬才華獨擅場
酒勝吸殘杯月小
詩豪吟破鏡天長
當年試問憑何物
惱亂蘇州刺史腸

送周勉仁司訓考滿之京

十年萍梗各西東
故里今朝喜再逢
曉日有盤堆首蓿
秋江無樹怨芙蓉
君門奏最文偏重
客路看花酒正醲
愧我若逢知己問
為言吟苦鬢蓬鬆

林景清

連江人有
竹窓小稿

送高孔明貢元朝京

大明啓文運奎光燭寰區六經脩治教四海宗唐虞英
才育庠序科貢惟兩途歲時重遴選濟濟登天衢偉哉
高夫子世業稱名儒窮經務深造秉志懷遠圖場屋屢
弗利烏兔驚奔趨楚山隱良璞滄海遺明珠秋來忽充
貢別我遊皇都孤舟蟻江曲情深倒玉壺蘋花弄秋水
霜葉颯高梧執袂忍分手感時心轉孤去去勿淹滯金
門曳長裾

往山東獨宿城東驛適中秋見月不寐有懷賦

此

丈夫四方志高遠當自期四十尚未遇我生將何為此
身類萍梗飄飄隨所之去年當此夕莆陽歎別離今年
況在客又值中秋時明月不我棄萬里長相隨碧落淨
如洗清光滿無虧幽懷觸佳景技癢誰能醫恨無知音
者酌我碧玉卮就寢苦不寐起步當前墀涼風濕我巾
金風吹我衣徙倚恣瞻翫徘徊動遐思親聞隔山海清

樽知共誰柏臺憶良契對此爭光輝仙舟有同侶買醉
情怡怡獨我抱孤悶勞勞客天涯問月月不答隨雲向
西馳

臨清登舟懷故鄉諸耆會

秋光忽已半暗蛰作寒聲堤柳漸落葉風露涌淒清客
懷易成感迢迢故鄉情城東有別墅朝夕聚羣英手談
復觴詠絕無塵慮生愧我獨何為勞勞苦浮名孤舟烟
水上遠道恒心驚

上祭酒邱先生

生本凡庸子家居閩海涯少小頗知覺向善心孜孜長
大事儒業執經遊泮池竊廩踰十載五科皆見遺年歲
苦相迫發身無他岐慈母早棄背嚴翁霜鬢垂顯揚失
初志驚惕徒嗟咨池魚不自化籠鳥將安飛鱗羽縱脩
飭違時深見譏偶爾遇恩詔輸粟來京畿懷報苦不避
養祿圖孝思幸得橋門路拜瞻我宗師造就蒙至教聞
見增新知滿擬策駑鈍于時當脫羈詎意蹈前轍所謀

轉乖違行取限名次三年尚無期迢迢八千路家山音
信稀歸計既弗遂行囊亦無資濫叨餬口計數子來相
依深冬忽抱病請借求良醫適遇行禁罰謬坐違嚴規
誠恪莫自愬頑梗混同歸舊館不久復生徒各分離日
給仰無助寸心恒自持此情不得已卧地干霜威笞辱
固自取迫切還可推豈不深揣量叩叩陳苦詞班門衆
所畏操斧非所宜但謂師弟子恩義兼有之情或信可
憫往過寧復追雷霆雖震擊雨露多沾濡我師體天者

願言鑑愚癡

美人圖

曉院沈沈春晝長
曲欄風暖錦屏香
碧紗窓前罷梳洗
金蓮緩蹴雙鴛鴦
小娃展圖供玩畢
對語雕牀情自適
靈鵲枝頭報喜聲
標梅正是花生實

題余千兵梅花圖

將門豪客城東住
手植梅花三五樹
為愛寒香戶鎮開
坐對梅花日成趣
風流太守為寫真
老手筆精妙入神

半幅溪藤奪造化枝南枝北爭先春花如綴玉柯如鐵
標格由來自高潔髣髴西湖起朔風滿林瓊樹飄晴雪
豪客幽情誰得知對花看畫兩相宜昨朝留我花下酌
濡毫索取題新詩

梅竹圖為劉錦衣乃弟題

金臺有客簪纓族和氣裒然清可掬殷勤攜軸過我門
索取長篇賦梅竹致和老手妙入神襟懷磊落出風塵
扁舟曾度渭川曲尋芳重過西湖濱于時隆寒朔風冽

萬木千花盡摧折，惟餘梅竹抱貞姿。撫景吟看總竒絕，恍若驪龍一夜噴萬珠。又如素鸞奮翼凌空虛，雪霽暗香浮馥郁。月明清影弄扶疎，君不見林和靖隱居不受公家聘，放鶴西湖日賦詩。只與梅花樂情性，又不見王子猷平生愛竹無已時。吳中士夫有佳景，肩輿不問直造之。梅竹于人有如此，凡卉紛紛何足擬。無怪雲泉老致和，歸來寫入吳縑裏。潘君持贈托意深也，知友道重千金。他日披圖遠相憶，還期全保歲寒心。

疎花待月圖為王宗式題

陰雲蔽天天作雪朔風捲地地欲裂園林百卉盡凋零
惟有梅花逞孤絕根盤大地老如龍柯飽風霜勁于鐵
南枝向暖先漏春北枝禁寒猶待月月月光未出花未開
月與梅花暗相結花神問月何遲遲月道陰雲久蔽之
雲開月出花始放月照花神光陸離暗香飄拂天風度
疎影橫斜映窻戶對月看花酌鉅觴他日尋盟不相負

牧羊圖

山南碧坡春草香山下合流春水長楊柳風前氣蕭爽
原是田家出牧場牧兒放牛依水草坐石眠雲情自好
偷閒學得弄山禽夕陽在山牛亦飽隔崦茅簷舊世居
朝出烟村暮返閭牛尾何須縛田火牛角何曾挂漢書
簑衣若笠紅塵表萬事忘機心不擾明日公田布穀催
一犁耕趁南村曉

題龍

春雷一夜天池震七澤濛濛烟雨暝數聲驚起卧潭龍

怒捲銀濤飛萬仞黑雲影裏露奇形鱗甲錯落光縱橫
鬚鬢奮張聳頭角炯炯射海雙瞳明伊誰老手妙無敵
奪得天機歸筆力所翁之後豈無傳只恐驚愁山鬼泣
龍兮龍兮真有神須臾變化隨屈伸何當吸盡滄海水
徧澤枯槁皆回春

題虎

壯哉負猛氣元文連舊斑雙睛夾明鏡據地當南山
山百獸不敢出遠近聞風心膽慄空林巡遶張雄威掉

尾磨牙如待食一聲長嘯懾萬夫松梢靈鷲驚相呼飛
雲谷口日將暮大風颯颯吹黃蘆吁嗟惡性本可怕人
有善心當感化君不見劉琨牧伯異政多負子曾看遠
渡河

題煮雪卷

元冥凜冽風氣剛同雲蔽野天無光漫空柳絮亂飛舞
大地一色瓊瑤粧先生臞然坐茅屋左有圖書右筆牀
竹爐石鼎燒榾柮須臾取雪烹成湯武夷游子多相識

龍芽雀舌隨意將陶家近可說風味党尉不必誇羔羊
一啜能令睡魔走再啜齒頰生餘香三啜搜枯句已就
澹然意趣偏悠長翻憶天厨大嚼者經年戶素何所償
安得相從語清絕一洗紛紛腥穢腸

題楊金吾忠夫湖陰夢卷

墨花仙吏當少年時常為湖陰遊而得仙樓夢覺
而異之形諸詩歌蓋以紀勝遊之奇事也仙吏平
生性不羈有才思凡海內名山大川騷人墨士必

欲與之神會心得然後已故其經歷之處山靈水
秀仙氣相符而夢寐每相感焉昔揭曼碩放舟江
上有盤塘之遇林子羽載酒登山有瑤華之夢二
君紀實詩文尚載簡冊此皆二君未遇時所有者
厥後曼碩名登玉堂子羽位列粉署豈非山川靈
秀之神之先知耶噫以仙吏昔日未仕有仙樓之
夢今日既仕有名價之隆他日爵位崇高駸駸
未已較諸二君之事業其亦異世而同風者歟予

因覽其所作為識其事且用續貂于左方

墨花仙吏江東彥蘊藉風流豈多見琴鶴相隨一葉舟
名山大川覽將徧湖陰形勝天下奇雲帆過此多新詩
山川神欲與之會忽作美人來夢思含羞故向東風立
髣髴花前舊相識蛾眉半掃橫春山星眸兩點凝秋碧
兩娃前導門徑幽美人攜手登仙樓樓中圖史盈几案
一洗仙吏平生愁美人起通問仙吏情恍然須臾侍兒
列春宴八珍九鼎羅樽前一觴一詠歡無極恨莫揮戈

留白日句句含情如有求酒闌更入凝香室雕牀繡褥
飛鳳皇錦衾寶枕聯鴛鴦美人細語知名久班馬才華
獨擅場奇逢自古真難得始信千金當一刻夢覺孤蓬
別有天乳鴉啼樹東方白

和卓怡秋琳井幽居韻

識破浮榮早悠然戀故栖雨香花滿塢苔破笋穿泥兀
坐江天晚長歌山月低曉來值隣叟授簡索新題
卜築塵市外風景最幽奇有子閒偏樂無官懶亦宜白

雲依渚靜紅日上窓遲試向林頭望山光總是詩

水口驛寄三山諸友

一束琴書上使槎為承嚴命赴天涯
九秋風露將寒早
千里關河去路賒驛舍逢人頻送酒
鄉途笑我亦思家
遙瞻雲樹雙眸濶吟倚孤蓬日又斜

到京拜懶菴先生不遇寄詩山庄趣之

十幅征帆破曉烟因過白下繫江船
瞻依山斗情何限
跋涉關河路幾千杯酒笑談期再續
人生會合苦難全

悠悠多少胸中事寫入新詩寄輞川

歸舟度姑蘇驛

姑蘇南去望松陵纔過長亭又短亭客舫笙歌聞斷岸
漁村燈火起寒汀歸心逐逐雲邊鳥行蹟漂漂水上萍
閩路三千何日到推篷吟對晚山青

送袁玉成畫史歸莆

胸中邱壑筆端移為客三山又許時夜雨不禁孤館夢
秋風偏起故園思交情錦軸詩千首送別陽關酒滿卮

他日壺山相憶處
嶺梅毋惜寄南枝

送施克禮遊南都

子長聲價重璫璣
又上仙舟入帝都
千里多情懷故舊
十年清夢憶江湖
停雲梨嶺詩堪咏
對月蘇臺酒易沽
客邸相看風物好
謾將歸興托尊鱸

和魏竹溪秋後病起詩韻

華屋沈沈覆綠陰
柴門靜掩碧苔深
閒情卧聽南山雨
清夢驚回午夜砧
酒熟可招隣叟醉
功成不愧古人心

傳家留得蘭亭墨間向窓前教子臨

元夕臺江賞燈

散步城南興未厭太平風景藹閭閻
歌聲笑語家家沸月色燈光處處兼
玉燭春調元有自金吾夜禁不須嚴
醉歌烏帽東風軟火樹銀花壓四簷

秋後夜起述懷

暗數流光似擲梭平生事業愧蹉跎
不堪卧病經旬久添得新愁萬種多
籬菊幽香纔破萼井梧涼葉乍辭柯

扶筇試向窓前看強學吟翁一醉歌

和高太守放歸詩韻

百年功業喜能成便覺浮榮一羽輕
秋舍重尋難泰約寒江新結鷺鷥盟
菊松籬落歸何早風雨波濤夢不驚
獨上高城聊縱目青山天外暮雲平

東洲清隱卷

薜蘿門逕掩清風高隱東洲有此公
新甍常開留客醉舊書多積課兒攻
東林牧散秋雲外遠浦漁歌夕照中

笑傲乾坤雙眼濶好懷收拾入詩筒

應例朝京辭學

十載寒窓聽曉雞每將黃卷對青藜獨憐白髮猶無養
謾道青雲別有梯帝闕且沾新雨露橋門還理舊筌蹄
祇今聖代多求駿未許駑駘價自低

過蘭溪即景

重向蘭江上畫船推蓬撫景尚依然浮梁貼水如平地
古塔凌空欲礙天白日催人馳遠道青山笑我負芳年

明朝又過嚴灘下愧說爭揚祖述鞭

十六晚度青川驛懷石憲使

淮陽愴別已多時夙夜常懷命駕私素志乖違離膝下
微躬半落向天涯西風衰柳寒蟬咽落日荒村瘦馬遲
却憶霜臺人似玉一樽何日話襟期

十七夜宿苾村鋪曉行

千里尋盟度遠山人生會合許多難間關道路驚秋暮
索漠風沙起夜寒懷別此宵猶客邸相逢何日向臺端

月明茅店雞聲早僕從相催又據鞍

至京與嚴尚寶話舊

記得潼川從宦日相逢俱是少年時東風紫陌春遊慣
疎雨寒燈夜卧遲南北可堪相別恨窮通深愧負交期
于今又是都門會心事惟應范叔知

呈姜天官廷憲

從宦當年此地遊登龍喜遂識荊州江湖一別八千里
京國重逢三十秋紫禁承恩偏浩蕩寒窓刻志尚淹留

相知亦有常何在但愧無才似馬周

送曾廷瑞還鄉

賢關名籍喜相聯忍向都門醉別筵
驛路東風迎綵旆樓頭春水坐青天
異鄉景物歸詩酒壯歲功名在簡編
明到三山逢故舊細將羈況語燈前

寄孔容妻弟

城西別酒惜同斟轉眼年光兩度侵
笑語幾番鄉夢遠音書千里故情深
關心老父增頭白唾手微官尚陸沈

處世多愁應類子青燈都付短長吟

京闈下第適遇重九感懷

改轍觀光上國遊半生懷抱未能酬佳名此日為重九
潦倒黃花又一秋舊史重溫情戀戀白雲遙望思悠悠
空齋晝靜如年永四壁寒蛩送舊愁

斫桂曾將大斧磨雲深何處覓枝柯登樓有賦悲王粲
抱璞無人識卞和南國征鴻通信杳異鄉風景入愁多
高堂翹首閩天外從此應添兩鬢皤

門掩西風下第時
偏驚物候感睽離
雁知秋信歸何早
人比黃花發更遲
謾道不才當棄都
緣薄命主司遺
玉堂退食開清宴
孤負燈前預賀詩

臘月朔日大雪次林上人韻

深冬一夜六花飛
曉氣衝寒酒力微
野馬漫空同白戰
仙禽何處認巢歸
皚皚冬日埋周道
片片隨風上客衣
莫訝南窓僵卧久
從來車馬到門稀

呈莆田林秋官待用

秋臺袍笏際明時幼學功夫肯自疑白日妖狐正當道
朝陽彩鳳獨鳴岐忘身苦為蒼生計特詔還蒙聖主知
天北天南雲樹渺相逢今日慰相思

題王用虔乃尊西畊卷

望望雲莊接澮川謀生事業只依然披殘谷口一簑雨
畊破村西三畝烟隣叟請期迎社日野人懷惠說豐年
南陽莘野遺風遠千古芳名可並傳

望蘭亭

地迴亭孤烟樹蒼登臨未遂笑空忙茂林南望依然竹
曲水東流不復觴一代人豪還說晉千金墨跡已歸唐
乾坤俯仰成今古惟有殘碑卧夕陽

久雨感懷

舟度山陰值早春淹留道院忽經旬江湖自愧離家久
風雨誰能過我頻楊柳含情撩別思子規饒舌勸歸人
直須便整行裝去南望雲山是八閩

舟次黃葉村山水泛漲

拍拍溪流漲水痕
小舟難度泊荒村
酒家不許人賒飲
風雨瀟瀟緊閉門

過鉛山途中即景

踈籬茅屋傍青山
竹映梅花雪未殘
安得吳綾裁八尺
倩人移入畫圖看

題金絲狗

黃耳金毛耀兩睛
附書曾報主人情
太平籬落長年靜
不向花村吠月明

二月望日從鎮守繡衣遊鼓山

着屐尋幽到上方
遐心肯向暫時忘
白雲飛處千山隔
東望連川是故鄉

其二

坐閱江山會此亭
天風拂面酒微醒
長空一望春無際
落日千峰鳥外青

寄蘇州李郡伯藍別駕樊節推

同鄉交好復同官
嘉會如斯自古難
退食黃堂作閩語

蘇臺明月醉中看

城南別業為楊揮使題

虛亭臨水八窓開
旋切金鱗薦酒杯
半醉半醒隨偃卧
藕花風細枕邊來

題扇面鵲鷄

秋入郊原粟正肥
山禽成隊啄斜暉
爭雄莫向雕籠鬪
零落西風百結衣

寄大義陳野航

明月光洄水底天
野航常傍荻花前
山翁吟罷如泥醉
一枕江風自在眠

十載交遊托故知
登堂幾度醉題詩
琅峰昨夜中天月
照我清光減舊時

寄陳德符

野有腴田橐有金
更無塵事挂閒心
日高三丈眠初起
山鳥隔林啼正深

題淵明像

南山秋色滿東籬彭澤歸家鬢未絲白酒黃花聊自足
扶筇絕勝折腰時

林景清號竹窓連江人隸籍府庠食廩餼五試不第
援例入太學成化間授湖廣興國州判官雅善草書
吾鄉自永樂中王太史孟揚工于八法繼孟揚者竹
窓也少年遊金陵與名妓邵玉香狎賦有一清軒詩
多豔詞情語手書一卷向藏余家謝在杭喜其風流
韻致字法精工從余索去陳汝翔採其詩于晉安逸

志而先生全橐無從得也憶予少時有老學究持先生手藁欲售之先君因其索價高未之購歷三十餘年偶與友人倪柯古談及柯古乃尋學究而購之重加裝潢詩雖未甚奇警而書法之妙不減吳興予乃選其雅馴者錄為一帙以見先生之高標逸韻未泯于今也天啓三年夏日後學徐勗敬題

右李梅菴陳蔗軒林竹窓三君皆予郡人亦同時也梅菴蔗軒詩不多見興公孫茂才器之于鳴春徵響

內手錄數十篇竹憲則有全集興公既哀選之予再加刪潤合為一帙庶見闡幽之意云能始氏

石倉歷代詩選卷四百四十四